

Ane'
KALEZIA-nupoong
Paula'ke Daarievuru'nane'
Kara Baavootunanka
Ane'kooning

1:1 Kumponingee Ee'narai Paula' Bakaang Kara Okovui Nka-koo Miru'uu'na'

2:15 Teing Jiisuu'koo Baito-nupoong Naing Kumponingee Koonto'nuka Tampurimana'

5:1 Tanuaang Meekunge Baito-nupoong Siong-antavurimana' Tampa' Nkoveea'naang

Kumponingee Ee'narai Paula'
Bakaang Kara Okovui Nka-koo
Miru'uu'na'

(1:1-2:14)

¹ Ee aing dii' dootuu'nupoong Kalesia-nameensi' otorimaing osi kante-koo, nii'maikorori'ke ookarai nari' o'norimainge tampa' tampampimaang dii'anko daarirerompima ni'ninka Paula' ninka; ² Ning tee Paula' Kumponingee Baumai ee'noko Jiisuu' Karistoo' boo'keta daa'antavuu'nung, tekange ee'nakange koonto' miru'muretu'nung beekaang kara okomui nka-koo, nii'ninge deea'.

³ Biraanke ee'noko mooa dii'koo otoaing Kumponing Niuma-itaing ee'noko teieta Ovoring Jiisuu' Karistoo'. ⁴ Tee ee'nara niikaang oraka' nkonanka tonta'memuri baka avaru'nung kansi'koong orara aarumo-ita

moo'murii'naang enanaroong-koo otomaung-eta Niuma Kumponing meumpui. ⁵ Tee-koo daangang otoaing ookara batei boturoopa-koo. Ee', ee'na'.

Tokoonamuriau “Tampara Doorenang” Tampaama Siompai Pooariru'na'

⁶ Ning bakei ta'ninansi o'nong dii' da'deng bere'daririo' Kumponing-eta, tampa' bokururu'nung-eta dii' bauta'durii'naang Jiisuu' Karistoo'ke. Tee siperima ta'nina' nii'namurii' kara siong-koo tutumperu' “tampara doorenang” tamperima. ⁷ Teka tee nii'namurii' tampara doorenang otoa'. Nantoonge tosiraariko siperu' tampara doorenang Karistoo'koong ave'koo piavoromainge. ⁸ Baa tee, bane nii' ai' koosinung~ paning-eta deeko' daankiampipeu' oovunaare “tampara doorenang” tampampima tero daankiampiru'nung-pina' oro' deeaung, tee aa' tee barakosi'ari otoaing. ⁹ Enang napo' unaunantampiri naurampimang: Baa tee naning oovunara kara “doorenang tampara” tampuma daankirurimaung daka'pui tee tenaare tero taaraveru'naare, tee tee ee'nara barakosi'ari otoaing. ¹⁰ Aung arekee', ai' nantoong dotu-antavarama'naang minkuansinunge ai' Kumponing dotu-anta-koonge? Tee aa' nantoong dotu-anta-koong deea'. Nkaang aarumo nantoong dotu-anta narung-koong deeko' ning tee Karistoo' bakaang botovotonaa' deea'.

Doorenang Tampara Masikung Tee Baka Karistoo'ke Paula' Oko-antavuu'na'

11 Dii'ke mmaikori'ke ee' noru'erii'naang piamomaang tee ee'nara doorenang tampara ninge daankiantu'nung tee naning kansi'koong bakaang deea'. 12 Ai' nantoong-koo baremarava', napo' naninge nau-antamua', nka baka Jiisuu' Karistoo'ke sirapo'uu'nung ning-koo. 13 Dii'ke ning noru'meri o'nong nkaang urikung ootoo' Ju'nung aarumo-koo kuunge o'noko'na'; 14 Ning tee nkanavarang-koo bakei dau basi Ju'nung aarumo-koo nkanavitu-koo. Kaakatauro biikaang pare'naanta aa'na' purimari siompansitaa' teing dootuu'nupoong aa'na' tavarama turamparanko' pesi'arama'naang paaravama; 15 Aung aa' tee teketa ning-koo kapoo' nkoaru': Tee tee ning ponto'maravaruko Kumponing tero miru'muu' bakaang kara-okomui-nka deemaraa'naang; 16 Teketa bokumuu' domaang oparavaung amuu'naang, ee'noko napo' baka bakaang pia siompuitaa' tee Bauring ning-koo sirapo'uu' ninge daankiama'naang tee avitevitunanka-koo; 17 Tee' nkoarako naning baa tasi'antamuaing besi'ampa' ee'noko Jerusalema'aape mea' teing-anko ning-koo uro'kanoo'ka kara-okovuri nka-nupoong deempariru'ning-anko, teka ning Arebia-nameensi'aape tenkenantu'. Ee'noko napo' dama'ke Damaskas-namono-aape toromaru'. 18 Teketa beemare'pi masiraani tankinuko Jerusalema'aape napo' toromaru' Siipas, tee nii'na' Piita, beero'ama'naang, ee'noko kivora-ita pa'noko' doong o'nou' tee ninka. 19 Teka nii'ning kara okovuri nkanuka-koo ooarampa', Jeemisi narung deeko' Ovoring

baara'ma'nung ooantu'. ²⁰ (Aung kapoo' ninge dii' daarirerompimatomaung-koo Kumponing-koo uro'kanoo'ke ning tosimarava'.) ²¹ Teketa tee ning aa'ning-aapei meu': Siiria-nameensi' ee'noko Silisia-nameensi'. ²² Ee'noko tee nii'ninge ning oing oomaava' Karistoo' bakaning dootuu'nupoong-kooninge Judia'nameensi'ka. ²³ Teka tamung teinge ee' nari' taaramau': "Tee aung tee nii' tamuriko'nung enang tee minkunaa masika'antavampimaung daankivumang aa'nung tero turang-koo paaravuko'." ²⁴ Ee'noko teinge Kumponing daangampau' ning-koo.

2

Nii'ninge Kara okovuri nkanukai Paula' Daankiarako'na' Tampa' Tampau'na'

¹ Teketa kivora-ita karenaumo mare' tankinuko Jerusalema'aape meu' napo' Banabas ninka, Taitas nari' bokuansi. ² Kumponinge botomuio' nanantu' ee'noko tee doorenang tampara teing-koo Ju'deeaing-koo daankiamaung napo' teing teka nauarantu', miring-po'nupoong naing biikanairu-koo, ee' noru'ama: Aung kapoo' ning pore'momaung nii'ning porora daang deeng-antavaa'neeng. ³ Nka tee teinge aroo'au' bane nii'ning baka-bokunanka kontevoroio' tee-koo Taitas ni'ninka nari' moretu'nung dopa' toto'pamparuu'nung-koo dootuu' aappearako. Teing tee makensi'navitu nii'maikorori' tamparima maroita kuung porou'ning baakenemaarii'naang tee tampara ootoo'koo Jiisuu' Karistoo'ke nii' amuru'nung Moosesi-ning botoi dai'ari oto'keta tonta'antamurima;

⁴ Teinge nii' dai'anta-koonaa' tee' minkumaaru' nii' unaamori o'norining. Nka tee teinge nii' ninka nari' miring-po'nupoonge nkaang tampara doorenang aroo'aara botomaaria' Taitas dopa' toto'koo Kiriki'nung deemparako, Ju'deeaung. ⁵ Oki'noo' aroo' o'noria', bane batei oki'namu'koo. Tee kara koonto' doorenang tampara-koong orari-anta-koo taura'parampia' dii' noru'darampima. ⁶ Teing tee miring-po'nupoong deempariri kapoo' deea' ning-koo, ai' ookara teing nari' oro'nuka Kumponing-koo. Nka teinge tee miring-po'nupoonge nii' ninka nari' o'noru'ninge kapoo' nii'ning be'nu'antavai minkuaava' ninge minkuantu'ning-koo daua. ⁷ Bakei otoa'. Teinge tee ning noru'mau' Kumponingee ning aroo'mui botomuu'nung tee doorenang tampara okomui bereng-antavama'naang teing-koo Ju'deeaing-koo tee' nari' Piita oko-antavura botovuu'na' Ju'nupoong-koo. ⁸ Ai' ning tee Kumponingee iri' amuio' tampa' mintoomarako teing-koo Ju'deeaing-koo tasi'mau', tee' nari' Piita kara-oko-antavuo' tampa' mintoomparako'na' Ju'nupoong-koo. ⁹ Tee avuavu' Kumponingee deing tasi'paama Jeemisi dovange, Siipas* ee'noko Jooni, teing ee'ning oko'bosi'nuka tampaarimainge dootuu'koo, nee' Banabas naanka Paula' bireng batu'maaretu' nee' teing ninka manta'ka taa'ni'antamaarema nee' Ju'deeaing-anko merree'naang ee'noko teing Ju'nupoong-anko beroo'naang. ¹⁰ Teketa tee narung kapoo' masikung nko-koo naumaaretu'

* **2:9:** Nii'noo' miring Piita. Ooveai Jooni 1:42.

nee'ke, teing ata'oinku pakuarampee'naang, tee' ee'na' aa'na' piamou'na'ke.

Piita Dovange Tampara Doorenang Oraka' Pitu-aako Paula'ke Koompuru'na'

¹¹ Teka tenang Siipas Antioki'navuntu'koo pou'nanng ninge tee duta-koo karavama turampantu' kiimata-koo makosina' nkoario'.
¹² Ee' otong: Nii'ning nantoong mme' poroaruko Jeemisi-ankoita Siipas Ju'deeaing ninka tampa' nari' taamanaako'. Teka te' tavo'ariko dopa'toto'navitu-pina' mantompuri dama'du-aape kai'aru' ee'noko tonta'aru' teing tero navuariko'ning-ankoita. ¹³ Ee'noko tee' nkoarako teinge nii'ninge Ju'nupoonge Karistoo' siimpaako'ninge tampara doorenangkoong aarumo nari' daka'pai siompau' tee. Ee'noko aa'nou' Banabas nari' barampau' tevunge oravunge. ¹⁴ Teka tenang tampa' siimpaavaruko tee aarumo tampara doorenangkoong ninge oamira Piita turampantu' ookara-koo dutakanoo'ka ee' minkuama, “Bane da' Ju'nupoongkoonge niikaang aarumo sipei Ju'deeaug-pina' nkoraramaung. Tee' nkorarakotaa' arekee' enang tororari bere'antaverimang Ju'deeaing Ju'pina' otoroo'naang?” Tee'pantu'.

**Teing Jiisuu'koo Baito-nupoong
 Naing Kumponing Koonto'nuka
 Tampurimana'**

(2:15-4:31)

¹⁵ Aming-koo, nna' bane nii' Ju'koo meu'ke ponto'mariru'ning Ju'deeaing oreng-koo deea', teka nii'ke noru'ampiri otong Kumponing naning koonto' tampuaung Moosesi-nung boto siompumaung-koo, teka Jiisuu' Karistoo' masika'antavumaung-koo deeko'.
¹⁶ Ee'noko nii'ke Jiisuu' Karistoo' baitoampiru' Kumponing ninka naroomariri o'norii'naang Karistoo' masika'antavampimaung-koo, boto siompampimaung-koo deea'. Ee'koo, naning otoa' boto siompumaung-koo Kumponing koonto' tampupeu'nung. ¹⁷ Enang tee Kumponing koonto'nuka tammuriaina' besi'ampiri Karistoo' bakanavung siompampima nii'namurii' aarumoo-koo basi-antamuriko deeko', Moosesi-nung botoi taura'puaung-koo, tee-koo aarumoo-koo arekee' minkuampii'naang nii'ke? Ee' ee minkuampii'naang, "Karistoo'ke orara aarumoo-koo basi-antamuring."? A, tee' aa' deea' bakei. ¹⁸ Ninge oong boto aarempansinung sira'marapeu' napo' daa'amira tee aarumo boto sionge domang-koong, tee tampara doorenang daankiama pesi'ankotaa' napo' sipamira tee.
¹⁹ Nka tee ninge daa'ampauka'nung, ai' ninge tee Moosesi-nung boto siompamaa' noko teie teka totora'muu' nkaang sionsiong-koo ning boo'koo tuumpimura. Tee' ooansirai'nange bere'maru' Karistoo'koo bi'antamari tee ninka aa'barata'koo tero moontu'nung-pina' o'noi Kumponing-ankoi domamaraa'naang. ²⁰ Tee ning nari' Karistoo' ninka aa'barata'koo bi'mari moontu'nung deemaritaa' enang tee domaang ning-koo kuunge otoing koonto' ning-

koong deea', teka tee-koo Karistoo' kuunge domampari otong ning-koo. Ee'noko nkaang ootoo' enang o'nomaung anke kansi'koo Kumponing Bauring masika'antavansi domamari o'nomaung, ee'nara piaamura avaru'nung ning-koo boo'paraa'naang. ²¹ Kumponing naning koonto' tampupeu'nung dei aarumo boto sionge domang-koong paaravuko deeko', Karistoo'nung boo' tamunsi'nung deempapeu'. Tee'koo temurii' aarumo napo' daa'ampauka'nung Kumponing avusiro'ari tampa' nkomuu'na' tamunsi'nung deempara'neeng-koo.

3

Jiisuu' Masika'antavaara Tanuaang Meekung Nkavau'na' Kalesia-nupoong

¹ Dii' Kalesia-nupoong bakei kanukanu'nanka! Arekee'koo dii'ke kara masikung siperi, ai' pa naning doomaruringe? Nii'ke tee dii' naurarampiru'nung Jiisuu' Karistoo' baru' aa'na' siraka'antararampima koonto' dii'ke oovering-pina' tasi'antarampiri aa'barata'koo bi'ari dii'koo boo'paru'na'. ² Aung io' kapoo' narung dii'ke naumerii'naang: Dii'ke ee tee Tanuaang Meekung Moosesi-ning Boto siomperimaung-koo nkaveru'nung? A, Moosesi noru'eria' nkaveru', tee Jiisuu'koong doorenang tampara taaraverira baitorariru'nung-koo. ³ Aa'na' kanu'dariri ampa'doru'nunge Tanuaang Meekung nkaveru'na', ee'nara nkaverira domang neraka'dariru'nung? Tee domang neraka'dariru'na' ee tamung

mono bakaang iri'ke Tanuaang Meekung-eta taapo'ke dupeverii'naang noru'erimang?
 4 Teing kapoo' ivekeng tero mantontariru'ning enang ee tamunsi'nanka deemparing? Tee' nkoarapeu' daana'?
 5 Tee ee'nara dii' Tanuaang Meekung avusiro'ari aruru'nung ee'noko kapoo' ta'nimpaarii' purinto'nanka tavo'antarerurikoo'. Enang naumeriaing tee ee Moosesi-nung Boto siomperimaung-koo tee' biraankerurikoo' ai' doorenang tampara taaraverira baitorariru'nung-koo? Dii' aa' baitorariru'nung-koo tee' biraankerurimaung.

Kumponing Bakaang Maraka-anta Masika'antavura Biraankearu'na' Eebaraami'

6 Eebaraami' tee'ke, Daari Meekunge aa'pumana'koo:

“Kumponing bakaang maraka-anta masika'antavuo' ee'noko Kumponinge bakaang masika'anta oovura naning koonto'nung tampuu'.” *(Pupu' 15:6)*

7 Tee'koo enang tasi'periaing Eebaraami' baurukaa' masikeng teing nantoong masika'antapo'nupoong. 8 Teroita daariari otomaung Kumponinge koonto'nuka tampuriaina' teing avitevitu Ju'deeaing baitoariko. Daari Meekunge naumurimaung Kumponinge Eebaraami'koo tee tampara doorenang daankivuu'na' aa'puu'noo'ka:

“Ookarai avitevitue da'koo biraanke nkavaavaing.” *(Pupu' 12:3)*

9 Aung ee' miru'ari otong: Nantoong Kumponing-nung maraka-anta masika'antavaamaing tee,

nari' biraanke nkavaamaung Eebaraami' ninka, masika'anta-po'nung ninka.

Teing Moosesi Bakaang Boto-koo E'manaamaing Domaang Paa'ariaina'

¹⁰ Teka baata teing Moosesi-nung Boto siong-koo mantomparimaing teing bakaang barakosi'koo kuung otorong, ai' Daari Meekunge ee' minkuvumaung:

“Baa tee naning Moosesi-nung boto siompui tee' nari' keperuu'aravauka'nung ookara batei-koo daariari otona' pukevui tee barakosi'nii'.” *(Boto 27:26)*

¹¹ Ee'noko napo' ee' sira'pari otong tee naning Kumponing ninka naroomparavarupeu' Moosesi-nung boto siompumaung-koo Daari Meekunge napo' aa'puu'na'koo:

“Naning tee Kumponing baitovuko koonto' tam-puainung domamparavaing.” *(Abakaka 2:4)*

¹² Tee'koo Moosesi-nung boto sionavung makotua'navung deempari otong baito-aapenavung deearuko ee' minkuaramana'koo:

“Naninge tee boto siompui nkovuaing tee teing nko-nkonanka nkovuaining-koo domamparavaing.” *(Boontu 18:5)*

¹³ Teka Karistoo'ke moo'muru' nii' tee boto-koong barakosi'keta bakaang monoi barakosi' kune'ura nii' pari'antamurima, tee' Daari Meekunge minkuvumana' aa'puma,

“Ookara barakosi'po'nupoong koi'koo bi'aariaining.” *(Boto 21:23)*

14 Jiisuu' Karistoo'ke tee' tora'puu' tee Kumponing-nung biraanke Eebaraami'koo minkuvuu'nung Ju'deeaing-koo poo'naang, tee-koo baitomarimaung-koo nii'ke Tanuaang Meekung nkavampiaing, tee bauta' maraka-antamuru'nung.

Mosesi-nung Botoi Toto'puarupeu' Tee Teroitaing Maraka-anta

15 Mmaikori' ee, enang kara miru'po'nung naurampii'naang nii' doong kante nkomari-mana'koong. Noru'eriaing, kapoo' kara naninka kenaankai naroompurepeu'nung, ee'noko marakavareko narunge toto'puarupeu' ai' be'nu'uarupeu' bane naninka kansi'koonaanka marakavareko, ee'noko Kumponing bakaang maraka-anta toto'koo makosi deea' bakei.

16 Enang tee Daari Meekung-koo otoina' tee Kumponing Eebaraami' maraka-antavuretu' ba'dompeng ninka nari', ba'dompeng isi'isimpuaing. Daari Meekunge ee' minkuvua', “dakaning isi'isinanka ninka nari',” mmau'koo tampuma, teka narung minkuvuma ee' minkuvuu', “dakaang isi'ising ninka nari'.” (*Pupu' 12:7*)

Ee'noko tee isi'ising tee Karistoo' ee'nara miru'ari otong.

17 Tee aung kapoo' ninge miru'ansinung: Teie botoi toto'puarupeu' dama'ke tavo'kuu'nunge mare' narung daaku'keta beenaumo kivora divu'kuio'. Tee Kumponing kara naroon-antavui tero pinka'uu'nung ee'noko Mosesi-nung Botoi tee maraka-anta daang deeng-antakoo makotua'. 18 Nii'ke teving boto sionavung

siompampikotaa' Kumponing ninka na-roomaripeu'nung dei tee ee' sira'parapeu'nung: tevung nii'na' oro'navung Kumponing narooning-anta nka-koo, Eebaraami'ke siompuu'navung-pina' deea', ai' teie tee tamung Kumponing bakaang maraka-anta masika'antavuko Kumponing bauta'ui tee ninka nari' naroonii' tampuu'.

¹⁹ Enang aming-koo Moosesi-nung boto otong? Tee aa' tee oraka'nko otoko avuru'nung boto aarempaara oraka' nkoaamana' tasi'parii'naang. Kumponing tee' nari' oto'koo miru'uu' bera tee isi'ising, Karistoo', tavo'kuainoo'ke basi, ee'nara tero maraka-antavuu' nung. Tee boto tee koosinunankai po'antavau'nung Moosesi nauaama kara-pare' Kumponing ee'noko teing nantoong-koo meu'ke. ²⁰ Teka tenang maraka-anta Kumponing Eebaraami' avuu' nang Kumponing naning otoaruko kara-pare' Eebaraami' koonto' nauvuu'. Tee'koo napo' tee maraka-anta deu basi Moosesi-nung boto-koo, ai' boto tee tamung nantoong-koo otong.

Boto Tee Nantoong Jiisuu'koo Po'anta Tee-koo Kuung Otoroo'naang

²¹ Enang ee Moosesi-nung botoi Kumponing bakaang maraka-anta toto'pui otong? A, tee' aa' deea' bakei. Boto tee kapoo' nantoong domampuripeu'nung-pina' oro' otoi dei tee koomariri o'noripeu' tee boto siompampima. ²² Teka Daari Meekunge tasi'antamuru' nii' ookara orara aarumo-koo kuunge dai'mariri paapaa'marimaing, boto sionavung-eta

bere'marira Karistoo'koo baitomariaina' Kumponing ninka naroomarii'naang. Tee' nkomariko deeko' Kumponinge dupe-antavuaing tee bakaang maraka-anta koonto'nuka tampuriang-koong teing masika'antavaamaing.

²³ Tenang masika'antanavung oro'paravaruko nii' botoi nara'ka parammuri o'noriko' dai'muritaanange bera masika'antanavung oro'paravainoo'ke basi. ²⁴ Tee boto tee niikaang nau-anta-pina' otoko' Karistoo'anko po'antamurii'naang masika'antanavunge Kumponing ninka naroomarii'naang. ²⁵ Teka enang tee masika'antanavung oro'pario' nii' tee enang botoi tanatamura'. ²⁶ Enang tee Jiisuu' Karistoo'koo kuunge dii' ookara Kumponing baurukaa' deentaririning teie diikaang masika'antai. ²⁷ Dii' ookara ntong-koo minkie meeka'anta nkaverima Karistoo' bakaang tare-koo kuung poru'ning teing Karistoo'naunturi otoriaining, siivenke'deeria'. ²⁸ Ai' tee Karistoo'koo siivenke' otoa' ee'pina': Ju'nung ee'noko Ju'deeaung, botovotonaa' nuka ee'noko osikaiaang, nii'noo' donkaani napo' manikuma. Dii' teing navitu tee-koo kuung otori. ²⁹ Ee'noko enang Karistoo'koo kuung poring-koo dii' tee' nari' okoruriaing tee barenku Eebaraami'ketaing isi'ising-koong Kumponinge maraka-antavuu'nung.

4

¹ Tee ee'pina' minkuamaang, tee naning oki'nara barenku okovupeu'nung tee tenang oki'na'pari botovotonaa' ninka nari' basira, bane

teie ookara-koo dau basiari barenku okovuaing panka'parara. ² Tenang oki'na'pari otoko tee nii'ninge tanatavai otoko otong tee kavokavoro-nanka bakaning ee'noko tee aung tooto' bera batei baumai miru'uu'noo' basi. ³ Nii' tee' nari'ke, tenang Kumponinge oko-antamuriainang batei mme' tavo'kuaruko kapoo'nanka kanto'puaing kansi'aapening-koo bi'mariri aavu'mariko' barenku kong-koo. ⁴ Teka tenang batei dupevui makotui'o' Kumponinge bauring botovuu'; ⁵ Tee ponto'aru' nani-koo manikuma-koo. Moosesi-nung boto-koo kuunge ponto'aru' moo'urii'naang teing nantoong Moosesi-nung botoi kuung deempuri otoroko'ning nii' baurukaa' oko-antani'nuka o'norii'naang. ⁶ Tee'koo dii' okovui baurukaa' deentarike Kumponinge Bauringkoong Tanuaang botovuu' niikaang domang-koo kuunge taa'ni'poi karantamuriko' dotumarima aa'pampii'naang, Mma' ee, Mma'. ⁷ Tee tee enang Kumponinge tampa' nkoruio' da' tee enang bautara-ita bakeraring ee'noko tee da' bauring deentaring, ee'noko bauring deeko' tee da' barenku okoruing.

Paula'ke Kalesia-nupoong Napo' Pia-antavuru'na' Tee Taaravaava'naang

⁸ Tero tee tenang dake Kumponing noru'earuko' nang da' tee dai'dari otoko' teinge kapoo'nanka makotua'nanka kumponinanka deeng-anta-koo. ⁹ Teka enang dake Kumponing noru'eing, ai' aa' da' Kumponinge noru'dui. Tee'koo enang aming-koo da' napo' tororari teing kapoo'nanka kanto'puaing ninka dai'dari

otoo'naang, teing ninka toomo sitovuru'nanka, aruaru'nankai ee'noko aavu'arimaing? ¹⁰ Dii'ke tee temurii'koo aa'ning siompererimaung doong a'munte'mung, kaara averaa'teveraa' ee'noko mare' amatemare' Kumponing ninka narootariaina' besi'erima. ¹¹ Dii'ke ning ariri'antamering ee' noru'amira, "Ning dee'ma dii' paku-koo tamung pore'mou'."

¹² Mmaikori' ee, ning boto-ita taapo' tonta'maring tee' dii' taapo' otoriko'na'. Tee' nari' bere'darira o'noriaing. ¹³ Dii'ke noru'eri otong tenang tee siipai siipa-antamui'o' datemarara o'noi dii'koo tutung daankimaru', nka dii'ke ning oraka' nkomeria'. ¹⁴ Bane siipa-koo oraka' o'noi pore'antarampiko maareroria' ning-koo, baru' oraka' noru'meria', teka bakei Kumponing-nung koosinung~pina' maneena' nkomeru', Jiisuu' Karistoo' nkoveripeu'na' makosina'. ¹⁵ Arerai tee biraanke ning-koo enang? Aa'nung dii'ke piaamerima dapi' duta banke'darima ameriko' pakumerii'naang. ¹⁶ Ning enang ee dii'ke munte'merimang kara masakung naurampiru'nung-koo? ¹⁷ A, tamung munte'meriauka'nung teinge navuraariko dii' orari-anta-koo. Ning-ankoita siivenke'antaraariko dii'ke teing daangamperererii'naang piavoromang. ¹⁸ A'noo' nantoonge dii' masika' paku-koo navuraariko deeko' ookara-koo tampa' ee'noko ning dii' ninka nari' o'noko naro' deea'. ¹⁹ Ee mmaikori', ning pareaava'naang sisikeeravoromana' sisikeeramomang dii'koo, dii' napo' ponto'anta-koo Karistoo' napo' dii'koo domang-koo tampa'

taa'ni'anta-koo bera taa'ni'poinoo'ke basi.
²⁰ Piaana' ning tee dii' ninka nari' o'noria'. Dii' makosina' kara-koo piamomaang, nka enang papaaramaring diikaang aarumo-koo isipo' otoriko.

Tee Mirumiru' Eekaa' ee'noko Seera' aa'naanka-koong

²¹ Naumeaing dake Moosesi-nung boto-koo kuung oto'koo piaromaunge, tee boto ee taaraveaung dake? ²² Daari Meekunge ee' minkuvumaung: Eebaraami' baurinketa kenaankara otoreko', narung teni Seera' bauring, teni ovorinani, Eebaraami' ba'aang. Ee'noko narung teni Eekaa' bauring, teni tamung Seera' bakaang botovotonaa', dai'nisinani. ²³ Teka tee teni dai'nisinani bauring tee Eebaraami' mononamenge noru'ari nampui' tee tooto' bauring paraevuu'nung tee barenku nka-koo makosi deea', ee'noko tee teni bisiira dai'arava'nani bauring tee Eebaraami' Kumponing miru'ui' nampuu'nung-koo maraka-anta siompui' tee tooto' bauring paraevuu'nung tee barenku nka-koo makosi.

²⁴ Aung tee minkunaa paara-anta-po'nung. Anaanka manikumaara tee kenaanka kara naroo'ng-anta Kumponing-etaing siong-antavaresi otong. Navung naroo'ng-antanavung tee Moosesi-nung boto sionavung, Sainai-namii-koo nauvuru'navung. Arebia-nupoonge temii Sainai-namii tee Eekaa'nami' tampaamaung. Ee'noko teni Eekaa', Eebaraami' ba'aang dai'nisinani, teni Jerusalema'navuntu' miru'ari otong, Ju'nupoong biikaang osi pankaing.

25 Ee'noko teing Ju'nupoonge Moosesi-nung boto siong-koo paaravaama Kumponing ninka naroompariaining-pina' noru'arimainge biukoree'ai otoromanamono temono. Ee'noko teing teing temono baurukaa' tee boto-koo dai'nisinuka deempariri otorong.

26 Teka nii' niikaang osi pankaing Jerusalema' paning-koong, ee'noko temono tee Moosesi-nung botoi dai'arava'namono. 27 Daari Meekunge Jerusalema' paning-koong dama'ke oro'paravaing teronung-koo deto basi tampuu' manikuma-pina' kara nauvuma aa'puu'na'koo:

“Doturaravaing da' bisiira pareai. Ta'nina' duuru'kiaai bane da' tooto' mantompeai. Ai' Kumponing da' teni daka-pina' otomai maraka-antaruing teni kura'nari' bioko deentaraa'naang teni ba'ung-po'nani puru'ei.”
(*Aisaia' 54:1*)

28 Mmaikori' ee, nii' enang dai'arava'nani bauring pina', Aisake' pina' o'norining, maraka-antanavunge ponto'nii'nuka. 29 Ee'noko tee tee' nari' tee tooto' mono siompui ponto'aru'nunge oraka' nkovuko'na' tee Aisake', Tanuaang Meekung bakaang iri'ke ponto'aru'nung, tee' nari' enang nkomaarimaung nii' teinge mononamenge noru'ariri Kumponing ninka naroonng-koo paaravaamainge. 30 Teka teie Daari Meekunge arekee' minkuvumaung?

“Bata'eaing teni dai'nisinani ee'noko tee bauring, ai' tee dai'nisinani bauring tee barenku okovuauka'nung tee ninka teni dai'aravai bauring ninka nari'.”
(*Pupu' 21:10*)

³¹ Tee tee enang, ee mmaikori', nii' dai'nisinani baurukaa' deea' teka dai'aravai baurukaa' nii'.

Tanuaang Meekunge
Baito-nupoong
Siong-antavurimana' Tampa'
Nkoveea'naang

5

(5:1-6:18)

Nii' Simpiri'antanii'nuka Karistoo'koo Kuunge Nantoong Tampa' Nko-koo

¹ Karistoo' tee nii' unaa-antamuru' dotu-marii'naang unaamori. Tee'koo naurampimang, ima'dariri donkoniriai, ee'noko doonko napo' kinkiniriauka' dai'nisinuka ninka nari' pake'deeri.

² Enang ninge Paula'ke bakei naurampimang, dii' teing Kumponing ninka naroontarii'naang piarorima dopa' toto'darima boto sionavung aroo'erima deeko', Karistoo'navung siperimaang pakururipeu'navung. ³ Napo' unantampiri nauramping ninge dii', ookara dopa' toto'navung aroo'eriaining dii' tee ootukunung boto Moosesi-nung pukeveri siong-koo dai'dariri otoriaining. ⁴ Aa'noo'naang, Karistoo'keta tee' toto'darii'naang dii' ee'ning Kumponing-ankoi koonto'nuka deentarii'naang piarorimaing tee boto siomperima, ee'noko dua'daririning-pina' otorii'naang bakaang avusiro'ari moo'navung-eta. ⁵ Teka tee Tanuaang Meekunge pakumurio' baitomarima te'mung koonto'nuka taa'ni'moriaina'mung-koo nemariri o'noring.

⁶ Nii' Jiisuu' Karistoo'koo kuung o'noritaa' dopa' toto' ee'noko toto' deeaung kapoo' deea', teka teie baitoi deeko' piaa ninka nkoaramaung. ⁷ Dii' tee deikoo'koo tero tampa' kua'dariko'ning-pina' otoru'ning, enang baie napo' toto'antarurio' tee kara masikung sionavung siperi? ⁸ Tee temurii' kara dii' daang aroo'antaruru'naare tee dii' bokururu'nung bakaang kara deea'. ⁹ Tee-pina' kapoo' oki'noo' dera'ke ootukunung dera'antavupeu'na' teie naninge dii' nko-antaruru'nung. ¹⁰ Masika' noru'ansi otong Ovoring-koo o'noi, dii'ke nkaang noru'koo taapo'ke nii'na' noru'eriauka'nung ee'noko baa tee naning dii' orari-antarurinung tee kiimata nkavuaing aa'nung tee ninge noru'ampa'. ¹¹ Ee mmaikori', nii'ninge aa'maamaung, "Paula'ke dopa' toto'navung daankivumaung." Nka tee' deea', ai' ning aming-koo oraka' nkomaamang tevung boto sionavung-koo baukoree'nukai? Ninge tee' daankiansi dei tee daang-antavampeu' tee doorenang Jiisuu'ke nii' domaang moo'muru'nung-koong, aa'barata'koo boo'pari boto bakaang taretare bakevura, ee'noko teinge Ju'nupoonge too'dempaavarupeu'. ¹² Maiko' teing dopa'toto' siempaama dii' pore'antaraarimaing avitoitoo'koo bii'ka biikaang mono totototo'paripeu'nung.

¹³ Dii' mmaikori' unaarori oto'koo bokururu'ning, teka unaarori oto'koo otori diikaang mono bakaang pia narung siong-koo taura'dariauka', teka piaareerima pakureeriai dii' nii'ning-koo botovotonaa'nuka noru'dariri.

¹⁴ Ookara botonanka Moosesi-nung tee nanaare-

koo dupeari otong ee' minkuvumanaare-koo:
 “Dake tee naning da'koo due'nung daka piaarara-
 mana' nari' tee' piaaveaing.” *(Boto*
5:16)

¹⁵ Teka oraka' nkoreerima orari-antareeri'neeng
 dii'ka.

Tanuaang Meekung Siona' Tampa', Urikung
Onou Siona' Oraka'

¹⁶ Teka enang aa'dampimang, Tanuaang
 Meekunge naururiaina' siomperiai ee'noko
 mono bakaang pia siomperiauka'. ¹⁷ Ai' mono
 bakaang paii tee Tanuaang Meekung too'dempui
 otong ee'noko Tanuaang Meekung bakaang
 paii mono too'dempui otong, ai' anaanka tee
 turampeereamanaanka ee'noko dake kapoo' daka
 nkovepeu'nung otoa' tenaanka-koo narung
 taaravearura. ¹⁸ Dake Tanuaang Meekung
 taaravera siompeaing deeko' da' tee boto-
 koo kuung otoa'. ¹⁹⁻²⁰ Mono bakaang nko-
 nko ee'pina' sira'pari otong: nampeesi orari,
 kaukauro-nko, noru' ku'mi', maimaia'na' nko,
 kumponing tositosinanka siong, dopa-nko,
 oraka' noru', turang-nko, orarunsi ninka munte',
 iira bauko, mosii', kara-koo tata', siivenke',
 mamaironto', purinto'naru'ke kanu', tooreere
 dovang; ²¹ Ninge enang tautaurampimang
 tero tautaurampiru'na': Teing tee' oro'nanka
 aarumo nkoaamaing Kumponing bakaang muu'
 aarenaavauka'nung barenku oko-koo. ²² Teka
 tee sinang Tanuaang Meekung-etaing aung
 ee' oro': piaa, doturotu, mooa, da'deng iira
 deeaung, tampa' nko, avusiro', masika'anta,
 banainge oto', ee'noko baka pinka'ari oto';

²³ Aing pote-koong boto otoa' bakei. ²⁴ Ee'noko teinge nantoong Jiisuu' Karistoo' bakaninge tee biikaang mono-aapena' noru' aa'barata'koo taakavau' teing bakaning karakaraa'nanka domange etuvurimaing ninka. ²⁵ Tanuaang Meekung-koo kuunge domamariri o'norimaung deeko', tee' nari' Tanuaang Meekung ninka nari' nanampimaatoaing siompampiri. ²⁶ Nii' kirokainku-pina' o'noriauka', ereanameereauka' ee'noko mamairomeeriauka'.

6

Naninge sinang kavuaing tee-koo kapoo'koo keempumaung-koo

¹ Mmaikori' ee, dii'ke nii'nung narung oraka' nkoarako ooverira deeko' dii' Tanuaang Meekung siomperimainge tampa' pakueri koong-antaveriaing dooroomperi, tarerariri dii' tee' nari' napo' dua'dari'neenga. ² Naruna' naruna' pakureeriai manki'koo. Tee' nkorarima dii'ke dupe-antaveriaina' tee Karistoo'nung boto. ³ Nii'nung narunge aa'pumaato'neeng, "Ning narung kapoo'," nka tee kapoo'pina' oro'parava'. Tee' nkoarama tee ee'nara baka tosi-antavarapeu'. ⁴ Nii'nung naning ninka mintarama doturarama daangantaravauka', teka tutung norunoru'daravaing dakaang nko-nko-koo, tampa' otoing deeko' ee'na'koo doturoturaravai makosi. ⁵ Kumponinge kantemuri manki' nka-koo bamuru'. Tee'koo daangantaria' piaareeri pakureerimaatoai. ⁶ Aa'noaing tee naning dii' Kumponing bakaang kara nau-antarurimaung pakueri moo'eriainge.

⁷ Nii'namurii' onoue tosiruriauka', ai' Kumponing tee daang-pina' oro'anta deea'. Tee-koo kapoo'koo naninge keempuaing-koo tee tee-koo ee'nung-koo sinang kavuaing. ⁸ Dake dakaang mono narung dotu-anta-koo noru'ei keenkiaing deeko' dake teieta mono-ita orari-anta kaveaing simpe'muriaina'mung. Ee'noko dake Tanuaang Meekung dotu-anta-koo noru'ei keenkiaing deeko' dake teieta Tanuaang Meekung-eta domaang oparavaung kaveaing. ⁹ Tee tee enang kakarua'moriauka'nung tampa' nko-koo dama'ke makosinaveraa'koo tampa' kavampiaina' kontemoriauka'nung deeko'. ¹⁰ Tee'koo enang batei oto'memuri tampa' nkoarampaii ookara nantoong, baru'noo' teing nii'maia'kooning masika'antanava-koo kuung otoromaing.

Paula' Dotuaru'na' Karistoo'ke Aa'barata'koo Boora Simpiri'antamurio'

¹¹ Ooveriko enang daari-nko pari'amira daari pankaveroveroi' narunge daarirerompimang nkaang birenge taa'ni'antamari. ¹² Nantoong Kumponing ninka naroomparii'naang Karistoo' aa'barata'koo boo'paru' baitoara daankiampiko teing Ju'nupoong iiravoromaung dopa'toto' minkuampiaruko, Moosesi-nung boto dovang ninka. Tee'koo nii'ninge eturaarimaung dopa'toto'koo tampa' oro'parii' naang Ju'nupoong-koo. Maroita, Ju'nupoonge turampaariaroo'naang teing. ¹³ Teinge ee'ninge dopa'toto'parira boto bii'ka siompaavaunge, tamung dii' ee'ning dopa'toto'koo piavoromaung dii' tee' nkorariko miring pankaing nkavaava'naang.

14 Nka ning temurii' aarumo piamoaung bakei, Karistoo' aa'barata'koo boo'navung masika'antavamaung-koo deeko', miring pankaing nka-koo makosi. Tevunge kansi'nung aarumo ninka siivenke'meeresi aa'nong kansi'nung aarumo taakavaring-pina' otong ning-koo ee'noko ning taakamaring-pina' o'nong tee-koo. ¹⁵Tenaankai aa'noko dopa' toto' ee'noko dopa' toto' deeaung kapoo' basi-antavureaung, teka napo' neraka'pari nkonii'ke deeko' makosi. ¹⁶Mooa ee'noko piaa dii'koo otoaing aung ee'nara aarumo minkuansinung siomperimaing-koo, teing Isireeli masakeng-koo Kumponing bakanavitu-koo.

¹⁷Enang-eta deto ning naninge pore'antamuauka'nung, ai' ninge tee nkaang mono-koo Karistoo'koong taa'menanka taa'ni'anta-pina' kompani o'nong.

¹⁸Dii' mmaikori', tee biraanke niikaang Ovor-ing Jiisuu' Karistoo' bakaang diikaang tanuaang ninka nari' otomatoaing.

Masikung.

**Kara Naroong-anta Nerakung Kongarana'
The New Testament in the Naasioi Language of Papua
New Guinea**

Nupela Testamen long tokples Naasioi long Niugini

Copyright © 1994 The Bible Society of Papua New Guinea

© Faith Comes by Hearing

Language: Naasioi

Dialect: Kongara

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 21 Feb 2024 from source files dated 31 Aug 2023

0fe571ca-6209-55e0-bc3e-74b7123016b1